

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj: 7/10), na prijedlog Ministarstva zdravstva, Vlada Zeničko-dobojskog kantona, na 80. sjednici, održanoj 05.12.2016. godine, d o n o s i

ZAKLJUČAK

I

Prihvata se mišljenje Ministarstva zdravstva, po inicijativi Saveza općina i gradova Federacije Bosne i Hercegovine, broj: 667/14 od 27.10.2014. godine, za omogućavanje liječenja građana općine Breza u Kantonu Sarajevo, kroz izmjene Zakona o zdravstvenom osiguranju, koja je podnesena Skupštini Zeničko-dobojskog kantona, aktom broj: 667/14 od 27.10.2014. godine, a koja je dostavljena i predsjedavajućem Predstavničkog doma Parlamenta Federacije Bosne i Hercegovine, koje je sastavni dio ovog Zaključka.

II

Zaključak sa Mišljenjem Ministarstva zdravstva, broj: 11-37-18776/16 od 22.11.2016. godine, upućuje se u dalju skupštinsku proceduru.

III

Zaključak stupa na snagu danom donošenja.

Broj: 02-_____/16.
Datum, 05.12.2016. godine
Zenica

PREMIJER

Miralem Galijašević

DOSTAVLJENO:

1x Stručna služba Skupštine,
1x Ministarstvo zdravstva,
1x Zavod zdravstvenog osiguranja, putem ministarstva,
1x a/a.



Broj: 11-37-18776/16

Dana: 22.11.2016. godine

Vlada Zeničko-dobojskog kantona uputila je ovom Ministarstvu inicijativu Saveza općina i gradova Federacije Bosne i Hercegovine, koja je podnesena Skupštini Zeničko-dobojskog kantona aktom broj: 667/14 od 27.10.2014. godine, a koja je dostavljena i predsjedavajućem Predstavničkog doma Parlamenta Federacije Bosne i Hercegovine, za omogućavanje liječenja građana općine Breza u Kantonu Sarajevo, kroz donošenje izmjena Zakona o zdravstvenom osiguranju („Sl. novine FBiH, broj: 30/97, 7/02, 70/08 i 48/11), radi davanja mišljenja po navedenoj inicijativi, Ministarstvo zdravstva daje sljedeće:

MIŠLJENJE

Inicijativom Saveza općina i gradova Federacije Bosne i Hercegovine broj: 667/14 od 27.10.2014. godine, traži se omogućavanje liječenja građana općine Breza u Kantonu Sarajevo, kroz izmjene Zakona o zdravstvenom osiguranju.

Članom III 2. tačka b) Ustava Federacije Bosne i Hercegovine, propisano je da je oblast zdravstvene zaštite, zajednička nadležnost federalne vlasti i kantona. Članom 19. tačka b) Ustava Zeničko-dobojskog kantona, propisano je da su u skladu sa Ustavom Federacije Bosne i Hercegovine, za oblast zdravstva nadležni Federacija i Kanton.

Članom 1. Zakona o zdravstvenom osiguranju, propisano je da zdravstveno osiguranje, kao dio socijalnog osiguranja građana, čini jedinstveni sistem u okviru koga građani ulaganjem sredstava, na načelima uzajamnosti i solidarnosti, obavezno u okviru kantona osiguravaju ostvarivanje prava na zdravstvenu zaštitu i druge oblike osiguranja na način koji je utvrđen ovim zakonom, drugim zakonima i propisima donesenim na osnovu zakona.

Članom 13. stav 1. navedenog Zakona propisano je da se sredstva za ostvarivanje prava iz obaveznog zdravstvenog osiguranja, osiguravaju doprinosima od kojih se obrazuju fondovi zdravstvenog osiguranja, kod zavoda zdravstvenog osiguranja kantona.

Članom 82. stav 1. navedenog Zakona, propisano je da se sredstva obaveznog zdravstvenog osiguranja, osiguravaju u kantonalnom zavodu zdravstvenog osiguranja i u Federalnom zavodu zdravstvenog osiguranja i reosiguranja, u skladu sa namjenama, a stavom 2. istog člana propisano je da upravni odbor kantonalnog zavoda zdravstvenog osiguranja, uz saglasnost kantonalnog ministra sačinjava godišnji plan prihoda i rashoda za finansiranje potreba iz obaveznog zdravstvenog osiguranja, polazeći od raspoloživih sredstava, utvrđenog standarda zdravstvene zaštite i programa mjera za provođenje obaveznog zdravstvenog osiguranja.

Pružanje zdravstvene zaštite svih nivoa za osigurana lica općine Breza definisano je u Programom zdravstvene zaštite o pružanju zdravstvenih usluga, kojim se utvrđuje sadržaj i obim zdravstvenih usluga kao i programa za nivo Kantona, za svaku djelatnost zdravstvene zaštite po nivoima zdravstvene zaštite (primarna, sekundarna i tercijarna). Navedeni Program se donosi u proceduri koja je propisana članom 16. i 17. i 18. Odluke o osnovama, kriterijima i mjerilima za zaključivanje ugovora između Zavoda zdravstvenog osiguranja Zeničko-dobojskog kantona i zdravstvenih ustanova („Sl. novine Zeničko-dobojskog kantona“, broj: 6/15)

Članom 6. navedene Odluke, propisano je da su kriteriji za ugovaranje zdravstvene zaštite svih nivoa, broj i starosna struktura osiguranih lica, koja se vode u poslovnica Zavoda na dan 30. novembra godine, koja prethodi godini za koju se ugovori zaključuju.

Načini finasiranja programa zdravstvene zaštite o pružanju zdravstvenih usluga, polaze od Modela utvrđivanja naknada za finasiranje programa zdravstvene zaštite o pružanju zdravstvenih usluga iz obaveznog zdravstvenog osiguranja. Vrijednost Programa zdravstvene zaštite izražena je u bodovima, saglasno važećoj Naredbi o standardima i normativima zdravstvene zaštite iz obaveznog zdravstvenog osiguranja u Federaciji Bosne i Hercegovine („Sl. novine FBiH“, broj: 82/14 i 107/14).

U skladu sa navedenim osiguranim licima općine Breza omogućeno je pružanje zdravstvene zaštite primarnog, sekundarnog i dijela usluga tercijarnog nivoa u zdravstvenim ustanova na području Zeničko-dobojskog kantona.

Liječenje osiguranih lica sa područja Kantona, realizira se u ugovorenim kliničkim centrima (Sarajevo i Tuzla) za sva stanja koja se ne mogu liječiti u ugovorenim zdravstvenim ustanovama Zeničko-dobojskog kantona.

Osiguranici sa područja općina Breza i Vareš, kao hitni slučajevi mogu biti direktno upućeni na liječenje u KCU Sarajevo, samo na osnovu uputnice nadležnih ljekara Doma zdravlja, uz naknadno dobijanje ljekarske odluke za liječenje izvan Zeničko-dobojskog kantona. Ostali osiguranici Kantona ne mogu biti upućeni na liječenje van Kantona, bez dobijanja validne odluke ljekarske komisije o odobravanju liječenja van Kantona.

Imajući u vidu činjenicu da je osiguranicima sa područja Općine Breza, osigurano pružanje zdravstvene zaštite u Kantonu, te da na propisan način mogu koristiti sve usluge Kliničkog centra univerziteta u Sarajevu, koje se ne mogu realizovati na području Kantona, mišljenja smo da predložena inicijativa nije opravdana, što znači da se ne može zauzeti drugačije mišljenje.

S poštovanjem!

Dostaviti:

1x Naslovu,

1x Stručna služba Skupštine Kantona

1x a/a

MINISTAR

Dr. Dragoljub Brenjo



Broj: 01-37-21359-1/14
Zenica, 31.10.2014. godine

VLADA ZENIČKO-DOBOJSKOG KANTONA
n/r premijera Kantona


PREDMET: Inicijativa Saveza općina i gradova Federacije Bosne i Hercegovine za omogućavanje liječenja građana općine Breza u Kantonu Sarajevo-dostavlja se

Savez općina i gradova Federacije Bosne i Hercegovine dostavio je i Skupštini Zeničko-dobojskog kantona akt broj: 677/14 od 27.10.2014. godine, koji je dostavio predsjedavajućem Predstavničkog doma Parlamenta Federacije Bosne i Hercegovine, za pokretanje inicijative za omogućavanje liječenja građana općine Breza u Kantonu Sarajevo, kroz donošenje izmjena Zakona o zdravstvenom osiguranju FBiH («Službene novine Federacije BiH», broj: 30/97, 7/02 i 70/08 i 48/11), iz razloga detaljnije navedenih u obrazloženju pomenute inicijative, te zamolio razmatranje inicijative i povratnu informaciju o stavu Parlamenta FBiH o istoj.

Kako je u pitanju inicijativa za donošenje izmjena navedenog federalnog zakona, to je istu Savez općina i gradova Federacije Bosne i Hercegovine, prema članu 159. Poslovnika Predstavničkog doma Parlamenta Federacije BiH («Službene novine Federacije BiH», broj: 69/07 i 2/08) i podnio direktno predsjedavajućem Predstavničkog doma Parlamenta Federacije BiH, s obzirom da je tom odredbom propisano da *inicijativu za donošenje zakona mogu pokrenuti skupštine kantona, gradska i opštinska vijeća, kao i građani, preduzeća i druga pravna lica u okviru svojih ustavnih ovlaštenja, a da se inicijativa za donošenje zakona dostavlja predsjedavajućem Predstavničkog doma.*

S obzirom na navedeno, ali i činjenicu da je prema članu III.2. tačka b) Ustava Federacije Bosne i Hercegovine propisano da su federalna vlast i kantoni nadležni za zdravstvo, te da je članom 19. tačka b) Ustava Zeničko-dobojskog kantona takođe propisano da su, u skladu sa Ustavom Federacije, Federacija i Kantona nadležni za zdravstvo, tako da je isto u zajedničkoj nadležnosti Federacije i Kantona, potrebno je da u roku od 30 dana od dana prijema ovog akta, dostavite Skupštini Zeničko-dobojskog kantona mišljenje u vezi predmetne inicijative, koju vam dostavljamo, a ista je takođe od strane Saveza općina i gradova FBiH dostavljena neposredno i Vladi Zeničko-dobojskog kantona, radi daljeg opredjeljenja Skupštine po istoj u skladu s Ustavom Federacije BiH, Ustavom Zeničko-dobojskog kantona, Poslovníkom Predstavničkog doma Parlamenta Federacije Bosne i Hercegovine i Poslovníkom Skupštine Zeničko-dobojskog kantona.

S poštovanjem!



Prilog: Inicijativa Saveza općina i gradova Federacije Bosne i Hercegovine za omogućavanje liječenja građana općine Breza u Kantonu Sarajevo broj: 677/14 od 27.10.2014. godine

Dostavljeno:

1x Naslovu

1x Zakonodavno-pravnoj komisiji Skupštine

1x Savez općina i gradova Federacije Bosne i Hercegovine, ul. Musala 5/I, 71000 Sarajevo- n/r predsjednika Predsjedništva Skupštine Husejina Smajlović- na znanje

U predmet

- 05-03



SAVEZ OPĆINA I GRADOVA FEDERACIJE BOSNE I HERCEGOVINE
ASSOCIATION OF MUNICIPALITIES AND CITIES OF THE FEDERATION OF BIH

05-01/30 10.11.14
05-03/21.10.14

Sarajevo, 27.10.2014. godine
Broj: 677/14

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
Predstavnički dom Parlamenta Federacije BiH

N/r Predsjedavajući Predstavničkog doma

Priloga:		30-10-2014	
Grp. j. s.	P. j.		
01-	37-	21359/14	

Predmet: Inicijativa za omogućavanje liječenja građana Općine Breza u Kantonu Sarajevo

Poštovani,

Savez općina i gradova Federacije Bosne i Hercegovine je u skladu sa članom 51. Zakona o principima lokalne samouprave u Federaciji Bosne i Hercegovine („Službene novine Federacije BiH“ broj: 49/06) zakonski zastupnik svojih članica (80 jedinica lokalne samouprave) pred vlastima u Federaciji Bosne i Hercegovine.

U skladu s navedenim, Predsjedništvo Skupštine Saveza općina i gradova Federacije Bosne i Hercegovine je na Šestoj sjednici održanoj 02.10.2014. godine, između ostalog, razmatralo i Inicijativu Općinskog vijeća Breza koja se odnosi na mogućnost liječenja građana Općine Breza u Kantonu Sarajevo.

Tom prilikom Predsjedništvo Skupštine Saveza općina i gradova Federacije Bosne i Hercegovine je podržalo Inicijativu Općinskog vijeća Breza za poduzimanje aktivnosti Saveza na stvaranju mogućnosti za liječenje građana Općine Breza u Kantonu Sarajevo, a kroz donošenje izmjena Zakona o zdravstvenom osiguranju Federacije Bosne i Hercegovine kojim građani nebi bili diskriminirani po ovom osnovu.

Obrazloženje Inicijative

Općina Breza prostire se na teritoriji od 73 km², nalazi se u sastavu Zeničko - dobojskog kantona i graniči sa općinama Ilijaš, Vareš i Visoko. Prema podacima iz 1991. godine prostor općine Breza naseljavalo je 17 266 stanovnika što čini 0,4 % stanovništva Bosne i Hercegovine, a prema najnovijim statističkim podacima broj stanovnika je oko 14 000.

Naime, općina Breza je udaljena od Sarajeva 25 km, a od Zenice 65 km. Građani Općine Breza u današnjoj teškoj ekonomskoj situaciji su izloženi nepotrebnim troškovima u svim segmentima jer su administrativno u sastavu Zeničko - dobojskog kantona, a posebno kada je u pitanju odlazak u administrativni centar – troškovi prevoza, gubitak vremena i niz drugih okolnosti.

Građani Breze su se uvijek, kao i sada, školovali kako u srednjim, tako i na visokoškolskim ustanovama u Sarajevu. Ni jedan student u školskoj 2012/2013 godini nije upisan na Univerzitet u Zenici.

Kantonalna bolnica Zenica je izgrađena za potrebe građana Zenice te shodno tome nema smještajnih kapaciteta za prijem bolesnika na liječenje, te su liste čekanja jako duge i to po nekoliko mjeseci. Kantonalna bolnica nema dovoljno kapaciteta kao ni dovoljan broj specijalističkih kadrova, niti tehničke opremljenosti i ne mogu se ispoštovati sve dijagnostičke procedure.

Zakon o zdravstvenom osiguranju Federacije BiH („Službene novine FBiH“, broj 30/97, 7/02 i 70/08) je onemogućio građanima Općine Breza da se liječe u Kliničkom centru Sarajevo što je u suprotnosti sa Evropskom konvencijom o ljudskim pravima.

U vezi naprijed navedenog govori i činjenica da je sa područja Općine Breza više stotina građana fiktivno odjavilo mjesto boravka u Brezi i to uglavnom zbog liječenja, i takođe fiktivno prijavilo mjesto boravka na jednoj od općina sarajevskog kantona. Na taj način dolazi do izmjene demografske strukture stanovništva, kako Općine Breza tako i općina Sarajevskog kantona.

U obrazloženju inicijative ističemo da Općinsko vijeće Breza, svjesno činjenice da je ovo istinski problem za građane, već duži niz godina poduzima određene aktivnosti i pokušava kod nadležnih organa izdejstvovati pozitivan odgovor u vezi sa predmetnom inicijativom.

S obzirom na sve navedeno, molimo Vas da razmotrite ovu inicijativu, te da nas informišete o Vašem stavu po istoj.

Predsjednik Predsjedništva Skupštine Saveza
Husejin Smajlović, s. r.

Dostaviti:

- Naslovu
- Vlada Federacije Bosne i Hercegovine
- Skupština Zeničko-dobojskog kantona
- Vlada Zeničko-dobojskog kantona
- Općina Breza
- a/a

